

Sþ.

711. Tillaga til þingsályktunar

um framkvæmd á lögum nr. 85 1941, um prestssetur Staðarprestakalls á Reykjanesi.

Frá Gisla Jónssyni.

Alþingi ályktar að skora á ríkisstjórnina að láta nú þegar koma til framkvæmda ákvæði laga nr. 85 1941 um prestssetur Staðarprestakalls á Reykjanesi.

Greinargerð.

Með l. nr. 85 1941 er ríkisstjórninni heimilað að flytja prestssetetur Staðarprestakalls á Reykjanesi frá Stað á Reykjanesi að Reykhólum í Reykhólahreppi. Heimild þessi hefur jó enn ekki verið notuð. Nú er húsakostur þannig á Stað, að óhjákvæmilegt er að byggja þar nýtt hús yfir prestinn eða að kosta svo miklu fé til viðgerðar á núverandi íbúðarhúsi, að nema mundi heilu húsverði, auk þess sem kirkja staðarins er í því ásigkomulagi, að ógerlegt er að messa í henni, ef nokkuð er að veðri. Vegna þess, hve Staður er illa í sveit settur, en hins vegar fyrirhugað, að á Reykhólum verði komið upp menningarmiðstöð, ekki einasta fyrir hreppinn, heldur og fyrir alla Austur-Barðastrandarsýslu, væri það hið mesta óráð að verja miklu fé í húsabætur fyrir prestinn að Stað, og því eðlilegt, að horfið sé þegar að því að flytja prestssetrið og reisa nýjan prestsbústað á Reykhólum. Er þá og til athugunar, hvort ekki væri rétt að selja Stað og nota söluverð jarðarinnar upp í byggingarkostnað prestsbústaðarins.

Íbúar Reykhólahrepps mundu mjög fagna því, að þessi skipun gæti komið á sem fyrst, enda hefur nú of langur tími liðið, án þess að þessu höfuðbóli hafi verið sýndur sá sómi, sem til var ætlazt, er ríkissjóður festi kaup á því.